

8. Kiat-bóe, góa kā pau-koat pō-tiúⁿ kap chāi-tiûⁿ ê tūi-hong kóng, “POJ kàu-taⁿ iáu-bóe sí, iáu ū chit-si-á khùi-méh, ôan-chôan sī Tâi-ôan-lâng m̄-kiaⁿ sí, ū sìn-sim, ē kian-chhî ê kiat-kó. Tī bô siáⁿ-mih chèng-tī sè-lék ê chêng-hêng hā tiām-tiām choh-sit, tong-jiân beh iau-kiû pêng-hóan chá-chêng só-siū ê pek-hâi.”
9. Chng lüt-su ôan-chôan bô kóng-tiòh 1-kù chi-chhî TLPA ê ōe. Pō-tiúⁿ mā ôan-chôan bô hōe-èng Âng Úi-jîn kái-sàn KTH kap thiat-siau Tēⁿ kàu-siū chû-úi ê sò-kiû. Ún-giân kiàn-gî KIP iau-chhiáⁿ POJ, TLPA, Thong-iōng chit 3-ê tīn-iâⁿ ê lâng tī 1-kò-góeh lâi chiong chu-liâu chéng-lí kau-chhut, chò 1-ê kong-khai ê tián-lám, hō tāi-chiòng liáu-kái, phah hun-sò, chòe-āu chiah chhái-iōng. Góa mā ū kóng, khó-sioh pō-tiúⁿ beh kóaⁿ-khì lēng-góa ê hōe, bô siông-sè thiaⁿ. M̄-koh góa siūⁿ í Tēⁿ kàu-siū ê chû-úi kak-sek ē-sái tī KTH thui-tōng chit-hâng tāi-chì.

5/22 àm chin-chêng, Tēⁿ/Tiuⁿ 2-ūi Tâi-gí gián-kiù ê tāi-chiàng kap góa kóng hó-sè, in tī hōe-tiûⁿ chē--leh tō hó, ōe hō góa kóng. Tān-sī in lóng ū chhiong-hun ê chún-pī. Jū-hōng koh tī thàu-chá 5-tiám khí-chhîng siá 1-hūn lūi-sū pī-chiàn-su beh hóan-pok Âng Úi-jîn, hōe-lék chin kiông. Góa kóng ê ōe chin chē tit-chiap ín-iōng i ê ōe. Chin kám-sim.

Góa cha-mê 10-tiám-góa tñg-lâi Tâi-tiong, che sī góa hō tāi-ke ê chiàn-chêng pō-kò. Chhiáⁿ chí-kàu. Nā ū bô chèng-khak, á-sī làu-kau ê só-châi, chhiáⁿ kap Tēⁿ/Tiuⁿ kàu-siū mñng khah chheng-chhó--leh.

Pháiⁿ-sè, siá kah lo-li-lo-thi, chiah-nih tñg, lín ū nái-sim khòaⁿ, ló-lát. Chhiáⁿ chí-kàu. Ài kiâⁿ ê lō iáu chiâⁿ tñg. 2004.4.22



Góa Ē-hiáu Pêh-ōe-jī

Liāu Hēng-eng

Chá-jit, Lí bòk-su jīn-chin lâi kà Pêh-ōe-jī.

Khò-tñg góa, góa sim bô tī he.

Koh ū Lí kàu-siū iā-sī jīn-chin lâi kà Pêh-ōe-jī.

Harvard ê hák-seng chin hoaⁿ-hí, chit-hák-kî chiap chit-hák-kî teh óh Pêh-ōe-jī. Chóng-sī góa iû-gôan bē bat Pêh-ōe-jī.

Góa chêng-chêng siūⁿ: Góa siáⁿ-sū pí bák-chiu lô-lô ê khah su. Góa siáⁿ-sū bē-bat ka-kî ê bó-gí?

Góa iōng Sèng-keng Si-phian lâi khai-sí, bū-sà-sà, pí hit-sî thák ABC koh-khah khó.

Pêh-ōe-jī ê Sèng-keng, Hán-jī ê Sèng-keng, Eng-gí ê Sèng-keng, móa-móa 1-toh-téng.

Chiâm-chiâm góa ê chhùi liâm-chhut súi ê Tâi-gí, chhin-chhiúⁿ phah-khui pō-pòe ê siōng.

Góa sim chin hoaⁿ-hí.

Nā-sī lán ū sim, iōng-sim, lán tiòh chhin-chhiúⁿ khòaⁿ-tiòh hoe-lúi, jit-jit teh thián-khui, súi ê hoe teh óah hiän-hiän.

(Chok-chiá sī Boston Tâi-gí-chin-pō-siā ê hák-ôan)